



mjesečni Bilten

omladinska mreža bosne i hercegovine

februar
veljača
2018.

225

Dragi prijatelji/ce,

Predstavljamo vam februarsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **184** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u februaru 2018.	2
Planovi za mart 2018.	6
Mladi pišu	7
Aktivnosti članova mreže	10
Saopštenja/informacije/donatori/pozivi.....	24

Uživajte u čitanju!

AKTIVNOSTI ORC/HCA U FEBRUARU 2018.

„Mladi za bolju budućnost“

U sklopu projekta „Youth 4 better future“ tokom februara su održane četiri trodnevne vršnjačke radionice u Tuzli, Brčkom, Vitezu i Doboju. Radionice je prošlo 85 mladih iz gore pomenutih gradova.



Učesnici su imali priliku da obrade teme kao što su: identitet, stereotipi, predrasude i diskriminacija.



Radionice su bile interaktivnog tipa, a obrada tema počela je sa identitetom. Naredna dva dana učesnici su učili o predrasudama, stereotipima i diskriminaciji. Sa obzirom da su radionice bile interaktivnog tipa, mladi su na sebi svojstven način prikazali sa kakvim predrasudama, stereotipima i diskriminaciji se oni susreću.

Vršnjački edukatori (koji su u decembru prošli trening vršnjačke edukacije u Tuzli) na radionicama u Tuzli, Brčkom, Vitezu i Doboju bili su: Subašić Eldin, Čokić Merima, Rađen Dejan, Selimbašić Amila, Mujakić Emir, Biković Mirela, Karamujić Emir i Ibraković Nejla.

Radionice su završene dodjelom certifikata učesnicima. Temin odvijanja radionica bio je: 9. - 11. februara u Tuzli, 14. - 16. februara u Brčkom, i 16. - 18. februara u Doboju i Vitezu.



Održavanje radionica vršnjačke edukacije je finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država.“

„Zaigraj protiv mržnje“



Omladinski resursni centar Tuzla, zajedno sa Katoličkim školskim centrom "Sveti Franjo" iz Tuzle organizovao je turnir u malom fudbalu/nogometu povodom mjeseca februara – Mjeseca akcije "Fudbal za sve".

Na turniru su učestvovali timovi Elektrotehničke škole, Medrese, Katoličkog školskog centra, Međunarodne gimnazije, Medicinskog fakulteta, Ekonomskog fakulteta, RGGF-a, i Studentskih domova.

Turnir, pored zabave i animiranja naših mladih da se aktivno bave sportom, za cilj ima poslati poruku da fudbal kao igra ne poznaje razlike i da smo u toj igri svi ravnopravni bez obzira na naše porijeklo, religijska ubjeđenja ili seksualne afinitete. Turnir je podržan od međunarodne organizacije "farenet.org" koja već duže vrijeme ima podršku od velikih klubova iz Evrope i svijeta - poput Manchester City-a, Wigan-a itd. Pobjednici ovogodišnjeg turnira su ekipa Medicinskog fakulteta koja je u finalu pobijedila ekipu Behram begove medrese sa rezultatom 2:0. Nagradu za najboljeg igrača turnira osvojio je Eldar Delić,

učenik Behram begove medrese iz Tuzle. Pored nagrada za najboljeg igrača, dodijeljene su nagrade kapitenima ekipa koje su se nadmetale u finalu, kao i nagrade za najboljeg golmana i najboljeg golgetera turnira.



Omladinska grupa ORC Tuzla

Kreativno izražavanje slikanjem

U mjesecu februaru nastavljen je drugi modul psihoedukativne radionice *Kreativno izražavanje slikanjem*, koju je organiziralo udruženje Amica Educa.



Kreativno izražavanje slikanjem je tehnika koja se koristi za izražavanje vlastitih osjećaja, unutarnjih slika, stanja, ali i izražavanje događaja o kojima osoba još uvijek nije spremna da priča. Važnost slike koja nastaje ogleda se u njenoj emocionalnoj, a nikako u estetskoj vrijednosti. Tokom ovog modula stavljen je akcenat na traumatske događaje, te psihološko i simboličko tumačenje boja i simbola. Cilj radionice jeste suočavanje sa samim sobom, rješavanje unutarnjih konflikata, kao i razvoj vlastite ličnosti.

Radionica je sprovedena 19. i 20. februara, u trajanju od 4h. Predstavljanje i tumačenje unutarnjih slika, koje su nastale u likovnom ateljeu udruženja, realiziralo se tokom oba dana. Pored toga, prvi dan učesnici su radili na „pronalasku“ sebe u ponuđenim crno-bijelim fotografijama, ali su i razgovarali o emocijama koje fotografije donose. Drugi dan su učili o psihološkom značenju boja i određenih simbola, te razgovarali o traumatskim događajima, kao i načinu prevazlaženja istih. Iako je psihoedukativna radionica namjenjena svim ljudima koji žele da rade na razvijanju vlastitih kompetencija. Nastavak, treći modul, se očekuje od sredine marta. Na kreativnom izražavanju slikanjem učešće je uzela nova članica Omladinske grupe Omladinskog resursnog centra Nerma Sinančević.

UMiD 13



UMiD (Uči, Misli i Djeluj) je godišnja radionica koja se održava na Ilidži u centru Spjalica. 16 februara počeo je prvi (od ukupno 10) modul, 13-og po redu UMiD-a, i trajao je 3 dana. Sljedeći modul već je organizovan za 16-ti mart. Na prvom modulu, od 90+ prijava, primljeno je 26 učesnika od 18 do 30 godina iz različitih gradova Bosne i Hercegovine. Cilj radionice jeste da se mladi neformalno što više edukuju, i da znanje stečeno tamo prenesu mladima iz svojih gradova. Tokom prvog modula, tema je bila Team-building i Liderstvo, gdje su učesnici kroz mnoge aktivnosti, vježbe i energizere učili kolika

je bitnost samog vođe, ali također kolika je bitnost i cjelokupnog tima. Prvi modul se završio 18-tog februara, i učesnici željno iščekuju početak drugog modula.

U ovogodišnjoj generaciji UMiD-a učešće su uzeli novi članovi Omladinske grupe Omladinskog resursnog centra Mrkić Mario, Čokić Merima i Aličić Samira.

Strateško planiranje Vijeća mladih grada Tuzla

Tokom 24. i 25. februara u Kući plamena mira u Tuzli održano je Strateško planiranje Vijeća mladih grada Tuzla, na kojem su uzeli učešće članovi 14 omladinskih organizacija koje vode Vijeće mladih Grada Tuzla.



Metodolozi koji su vodili proces bili su Dajana Bakić i Emir Bašić, a organizaciju Strateškog planiranja pomogao je grad Tuzla kroz finansijsku podršku koju pruža Vijeću mladih. Tekst će biti dostupan za javnost u toku mjeseca marta.

REDOVNE AKTIVNOSTI ORC I HCA TUZLA

Tokom februara radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i

pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA MART 2018.

„Mladi protiv nasilnog ekstremizma



Partnerski projekat „Mladi protiv nasilnog ekstremizma“, koji realizujemo u saradnji sa „Proni Centrom za omladinski razvoj“ iz Brčko Distrikta i „PAX for peace“ iz Utrehta Holandija započeo je sa svojom realizacijom u mjesecu februaru. Aktivnosti koje očekuju ORC Tuzla u mjesecu martu su izrada web stranice za projekat, koju ćete moći pronaći na www.nenasilno.ba. Projekat je podržan od strane holandske ambasade u Sarajevu kroz MATRA program.

„Divided past – Joint future“



U toku mjeseca marta planiran je nastavak nacionalne kampanje „Divided past – Joint future“, koju ORC Tuzla provodi sa 19 partnera država Zapadnog Balkana i Turskom, podržanog od strane Evropske komisije.

Podsjećamo, u toku mjeseca februara smo završavali vizuelni identitet kampanje, dok za mjesec mart planiramo realizovati radionice za mlade u Tuzli na temu „Izgradnje mira u BH društvu“ i press konferenciju u Sarajevu na kojoj ćemo prezentovati istraživanje: „Proces pomirenja u državama Zapadnog Balkana i Turskoj: Kvalitativno istraživanje“ koje možete pronaći na: <http://jointfuture.org/news/qualitative-study/>

Također, tokom Marte u sklopu projekta **Divided Past – Joint Future** planirana je radionica za mirovne aktiviste, koji će imati priliku da se upoznaju sa Kintsugi tehnikom, te kroz aktivnosti Fleš moba i Vremenske kapsule ukažu na značaje pomirenja na Balkanu.

U sklopu ove kampanje planirani su okrugli stolovi i diskusije u Tuzli, Banja Luci i Sarajevu, praćene press konferencijama, na kojima ćemo putem medija javnost šire upoznati o istraživanju pod nazivom: „Proces pomirenja u državama zapadnog Balkana i Turske“.

*Ovaj tekst je napisan kao dio projekta **Divided Past – Joint Future**, te u sebi ne sadrži, niti predstavlja mišljenja ni stajališta Evropske Unije, njenih institucija i tijela. Odgovornost za informacije i poglede iznešene u tekstu snosi u potpunosti sam autor teksta.*

MLADI PIŠU:

Slobodan Blagovčanin

Ribar koji je umalo upecao Nobelovu nagradu

Arapsko proljeće u Siriji imalo je za rezultat preko 5 miliona izbjeglica u Evropi i desetine hiljada istih čije kosti je progutao Mediteran. Dok je Sirija gorila, a izbjeglice bježale u potrazi za sigurnim životom, ruku spasa im je pružao Kostas Pinteris sa ostrva Lezbos.

Ostrvo Lezbos koje je decenijama ostavljalo ljude bez daha i posljednjih nekoliko decenija bila jedna od omiljenih turističkih destinacija, danas je Oaza spasa mnogobrojnih sirijskih izbjeglica koje glavom bez obzira bježe od ratnog vihora u njihovoj domovini. Rat u Siriji je izazvao velike migracije ljudi ka Evropi, pokazao humanost Turske, podijelio Evropsku Uniju i slobodno možemo reći bio jedan od okidača ka „Brexit-u“.



Tokom svih ovih dešavanja u mjestu *Skala Sikiminia* živi Kostas Pinteris, skromni grčki ribolovac koji je živio i preživljavao od ribolova. Dane je provodio na svojoj brodici sa koje je bacao mrežu i zatezao štapove za ribolov, noću bi spavao u porodičnoj kući u kojoj živi sa roditeljima. Njegov mirni ribarski život poremetila su dešavanja u svijetu. Njegov telefon bi dostizao usijanje i to jako često u pola noći, a njegova porodična kuća postala je centar za volontere. Ribarska brodica postajala je utočište za davljenike u moru, a njegova nominacija za Nobelovu

nagradu udarila je šamar svim „Europejcima“ koji su se pobunili protiv pomoći izbjeglicama.

Kada se Kostas pojavio među nama, nismo uopšte znali o kome se radi. Vidjeli smo ogromnog, ali mirnog i staloženog čovjeka, u čijim očima nije bilo ničega drugog do tihe živosti, ali i zbnjenosti od svih nas koji smo došli iz različitih dijelova Evrope da učimo o Interkulturalnosti. Njegove ruke su bile snažne, a dlanovi izbrazdani i izderani od konopca njegovog sidra. Sjedio je blizu mene i staloženo posmatrao kako se čitava grupa razmaženo buni jer nam večera kasni. Kako bih prekinuo dokolicu upitao sam ga odakle je i čime se bavi. Kratko je odgovorio da je ribar iz malog sela Sikimini na sjeveru Lezbosa, udaljenog oko 10 kilometara morem od Turske.

„Dok sam bio dijete bavio sam se poljoprivredom. Zajedno sa svojim roditeljima dane smo provodili na plantažama maslina. Slobodne dane bih provodio kod bake i djeda. Oni su najveći razlog moje pasije prema morskim valovima i ribarskim mrežama. Tada sam zavolio brodice i poželio da kada porastem i ja posjedujem jednu“ govori Kostas, a onda sa ponosom u glasu nastavlja: „Već nekoliko godina imam svoju brodicu od koje sam nekada mogao pristojno da živim.“

Tih dana turska usluga u restoranima, na sreću, je bila izuzetno spora, a Kostas velikodušan i spreman da odgovori mojoj radoznalosti. Kako sam bio začuđen jer je govorio u prošlom vremenu, krenuo mi je potresno pričati svoju herojsku priču.

„Sve je počelo sa ratovima u svijetu, kad su mnogi poželjeli se domoći evropskog tla jer su vjerovali da je to njihova karta za spas. U malim čamcima dolazili su u sve većem i većem broju. Moram priznati da sam u početku bio jako skeptičan. Onda je počelo da ih dolazi sve više, u sve manjim čamcima i brodicama.“

Uz uzdah pravi kratku pauzu, a onda nastavlja: „Prestao sam da pecam ribe, moj život se promjenio za 180 stepeni! Peca sam ljude, ponekad sam i mrtva tla izvlačio iz mora.“

Na moj uzrujani pogled, ovaj živi superheroj nastavlja: „Da. To je moj život! Spasio sam hiljade unesrećenih migranata. Nažalost, za neke je bilo kasno, ali davao sam sve od sebe. Tokom takvih perioda danima ne bih imao vremena da privređujem za sebe, a moj život je bio pomaganje unesrećenih. Živio sam isključivo od roditelja“, završavajući poslednju rečenicu, kratko se osmjehnuo kao da se je pribojavao osude sa moje strane.



Naišao je na moj nijemi pogled i sebičnost koja se ogledala u iščuđivanju kako ga nije bilo strah za sebe.

Usljedila je burna i emotivna reakcija, kao reakcija kada poželite da se odbranite: „Plašio? Naravno da sam se plašio! Pozivi su stizali u gluho doba noći i to često kada je more od silnih vjetrova bilo razjareno. Obalska straža nije smjela reagovati, kolege koje su do tada sa mnom odlazili u „Pecanje ljudi“ ostajali bi nijemi, što sam razumjevaob obzirom da su porodični ljudi.

I šta onda vi da radite? Znaete da možete pomoći nekoj majci, djetetu ili starcu, a vi se okrenete na drugu stranu i nastavite da spavate? Ne bih mogao nikada živjeti sa takvom spoznajom. Ponekad je bilo toliko ljudi na mojoj brodici da sam čak i ja sumnjao u njenu izdržljivost“.

Danima i noćima iz roditeljskog doma je izlazio i pomagao ljudima, bez da je zauzvrat ikada išta dobio. Međutim, skroman kao i prvog trenutka kada sam ga upoznao, dodao je:

„Kada sam se iscrpljen vraćao kući bilo mi je dovoljno što sam znao da sam spasio živote tog dana ili noći“.

Onda je sa dozom ponosa i nevinim dječijim osmijehom prisjetio se jedne noći kada je spasio veliki broj ljudi :



„Kada smo došli na kopno, spaseni su stali u red i čekali mene. Neko me je pozvao, a onda su redom prilazili da me grle i ljube, zahvaljivali su se! Bilo je čudesno, starci i starice su željeli da mi ljube stope i na taj način iskažu svoju zahvalnost. Taj momenat, tu noć i taj osjećaj neću nikada zaboraviti.“

Iako je večera uveliko bila poslužena, nisam se previše obazirao. Mojoj radoznalosti i želji da čujem što više od ovog heroja nije bilo pomoći. Duboko u sebi sam znao da bi bilo primjereno sačekati da se večera završi i da obuzdam svoju radoznalost, međutim izjedala me pomisao

na nepravdu da čovjek koji spasava i koji je spasavao ljude je prepuštan sam sebi, bez ikakve pomoći od nadležnih vlasti. Kostas je na trenutak odložio svoj pribor za jelo i započeo:

„Evropska unija nikada nije pomogla ni meni, a ni mom selu ni sa jednim jedinim centom tokom ove krize. Ruku na srce, moram priznati da je Vlada Grčke u februaru ove godine nakon kvara na mojoj brodici kupila mi mehaničke djelove za brod, koji sam sam popravio.“

Nakon par trenutaka tišine u kojima mi se činilo kao da razmišlja, dodao je:

„Pa da. To bi bilo to. Nikakvu drugu pomoć nisam dobio.“

Nedaleko od nas sjedio je i gospodin Gurkan, organizator čitavog događaja na čiji nagovor je Kostas i došao. Čitavu noć se trudio da umiri učesnike zbog večere koja je kasnila, te mi se nije činilo da prati čitav naš razgovor. Onda je u jednom trenutku, taman kada se je naš heroj spremao da ponovo uzme pribor za jelo, rekao:

„Kostas, zašto se nisi pohvalio svojom nominacijom“?.

Kako nisam bio upućen o čemu je riječ, šutio sam i pogledom uperenim prema Kostasu čekao odgovor. Negodujući u tom trenutku, više što mora to uopšte da spominje, nego što smo ga omeli tokom večere rekao je:

„Iako mi to nije nešto posebno bitno, neko se je sjetio da me nominuje za Nobelovu nagradu. U tim trenucima bilo mi je mnogo draže što se je u svijetu govorilo o mom selu, o Skali Sikiminiji kao mjestu dobrih ljudi. Zaista nisam obraćao previše pozornosti na nominaciju. Pomagao sam i pomagaću jer sam čovjek i jer smatram da svi ljudi zaslužuju pravo na život!“



Ubrzo nakon toga, spori turski konobari su počeli da pospremaju tanjire koje je razjarena rulja brzinom bljeska počistila. Iako je običaj nalagao da nakon večere svi učesnici imaju zajedničko druženje, nisam im se pridružio. Otišao sam u svoju sobu i razmišljao dugo o čovjeku koji pomaže i ne traži ništa zauzvrat, o čovjeku koji je spreman rizikovati svoj život i svoju najveću ljubav, brodicu, kako bi pomogao nepoznatim ljudima o kojima evropska štampa bruji u negativnom kontekstu.

O čovjeku koji me je svojom dobrotom zapitao da li sam sebičan, svojom smirenošću podsjetio na sve trenutke kada nisam pomogao, čovjeku koji me je nadahnuo da o njemu pišem, znajući da ni hiljade stranica nisu dovoljne da se u njima pokaže njegova veličina!

Autor posebnu zahvalnost za izradu ovog članka upućuje: Athanasiou Dimou, za nesebičnu pomoć koju je pružio u izradi teksta i Gospodinu Gurkan Akcaer, organizatoru događaja.

Ovaj članak objavljen je na www.balkandiskurs.com

AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je u februaru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Ovaj mjesec učesnici prve grupe su pravili razne dekorativne i maštovite stvari uz pomoć lokalnih i međunarodnih volontera. Neke od tih kreacija su: pingvini, bumbari, pčelice, razni oblici od plastelina, sat sa pomjerajućim kazaljka za vježbu koliko je sati, svemirske rakete itd. Učesnici su vrijedno vježbali pjesmicu „Zeko i potočić“, uz pratnju gitare, čiji snimak je postavljen na oficijelnom You tube kanalu Omladinske organizacije Svitac (<https://youtu.be/M0sBP2Gssmc>).



Od materijala na radionicama učesnici su koristili karton u boji, kolaž papir, drvene i masne bojice, makaze, ljepilo, šljokice, drvene štapiće, razne dekorativne i ukrasne papire, plastelin. Drugi dio radionice je namijenjen za relaksaciju, osvježanje, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljom je kreativno izražavanje na kojima su učesnici pravili solarni sistem, marionete, rakete, ajkule od plastičnih flaša, te poster drveta na kojem su predstavljena sva 4 godišnja doba. Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad. Srijedom su muzičke radionice, četvrtkom sportske aktivnosti a petkom radionice njemačkog jezika. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u februaru je bio Adin Midžić uz asistenciju lokalnih, Weltwaerts i ERASMUS+ međunarodnih volontera. Sve aktivnosti se održavaju u Omladinskom centru Brčko distrikt.

„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju dva puta sedmično u prostorijama Omladinskog centra Brčko distrikt. U februaru je zbog različitih nivoa poznavanja jezika i gramatike održan eliminatorni test sa četiri vještine (komunikacija, slušanje, pisanje i čitanje i razumjevanje). Na ovaj način učesnici će biti podijeljeni u dvije grupe na radionici koja će se održavati četvrtkom - A1 stepen od 16:30 do 17:30, A2

stepen od 17:30 do 18:30, B1/B2 stepen od 18:30-19:30. Radionice komunikacije na njemačkom jeziku su namijenjene svima koji žele naučiti osnove gramatike i usavršiti već postojeće znanje i steći nova iskustva i poznanstva. Napredne grupa je nastavila rad na temu praznici, tradicija i kultura u Njemačkoj i BiH. Koordinator projekta su međunarodne volonterke iz Njemačke.

DAN 'SOCIJALNE PRAVDE' (20.02)

Povodom svjetskog dana "Socijalne pravde" organizovane su kreativne radionice za dvije grupe učesnika, metodički prilagođene uzrastu. Cilj radionica je bio da se promoviraju važnost svjetskog dana socijalne pravde, stabilnost i sigurnost, te važnost poštovanja, ravnopravnosti i timskog rada.



Mlađi učesnici su imali priliku obojiti radni list na kojem je predstavljeno dvoje djece, koja se bezbrižno igraju loptom, na kojoj je oslikan znak mira, te su učili šta znači pojam "socijalna pravda". Takođe su imali priliku odgovoriti na pitanja, kako se osjećaju kada vide da neki njihovi drugari nemaju tople stvari, zimsku obuću, ili uošte nemaju svoju sobu ili krevet. U zadnjem dijelu radionice su bili podijeljeni na tri stanice, gdje su igrali društvene igre, kako bi uvidjeli jednakost svih, kroz jednostavna pravila.

Poslepodnevna grupa je imala priliku pogledati kratki video klip prilagođen njihovom uzrastu sa aktuelnom temom radionice.

Vrlo je pozitivno što su učesnici aktivno učestvovali u diskusiji koliko je zaista zastupljena socijalna pravda u BiH, kako se građani ponašaju prema marginaliziranim grupama, te kako pravda tj. nepravda utiče na njihove živote. Zajedno su zaključili da treba svakodnevno činiti dobra dijela, kako bi pomogli da svijet bude bolji. Na kraju radionice, učesnici su kreirali zajednički poster, na kojem su oslikali, kako vide socijalnu pravdu u našoj zemlji.

DAN MATERNJEG JEZIKA (21.02)



Povodom svjetskog dana maternjeg jezika, kojeg je UNESCO proglasio 1999. godine, a koji se obilježava 21.februara, Omladinska organizacija Svitač je organizovala radionice iz dva dijela, metodički prilagođene uzrastu, na kojima je učestvovalo nekoliko grupa učesnika. Prvi dio aktivnosti je realizovan 21.02.2018. u Omladinskom centru Brčko distrikta. Cilj radionica je bila promocija i važnost svjetskog dana maternjeg jezika, te važnost poštovanja drugih kultura, ravnopravnosti i multijezičnosti.

Mlađi učesnici (4-7) su imali priliku čuti jezike koje govore međunarodni volonteri Omladinske organizacije Svitač (engleski, njemački, francuski i španski). Kao vježbu su radili didkatički zadatak prilagođen njihovom uzrastu, a koji se sastojao od izrezanih slova, od kojih su učesnici trebali da slože riječi: ljubav, pas, mačka i Svitač. Zajedno sa lokalnim i međunarodnim volonterima je snimljen i kratki video sa porukom "Zajedno učimo i rastemo u Svitcu". U zadnjem dijelu radionice najmlađi učesnici su igrali igre: „Na slovo...na slovo“, gdje su trebali razmisliti o određenoj riječi na maternjem jeziku koja počinje na zadano slovo.

Poslepodnevna grupa (8+) je imala priliku pogledati kratki video klip prilagođen njihovom uzrastu o brojnosti različitih jezika na svijetu koji se aktivno govore. Takođe je održana diskusija na temu jezika i vrlo je pozitivno što su učesnici aktivno učestvovali u razgovoru. Učesnici su takođe imali vježbu komunikacije bez korištenja jezika kako bi se pokazalo koliko treba cijeniti mogućnost govora. Na kraju radionice, učesnici su kreirali zajednički video klip, na kojem su poslali poruku na raznim jezicima.



Na poziv BZK Preporoda Brčko distrikt na suradnju i zajedničke aktivnosti, drugi dio radionica je održan 24.02.2018. u prostorijama Islahijeta u Brčko distriktu. Međunarodni volonteri Omladinske organizacije Svitac su pripremili četiri stanice, te pružili priliku učesnicima od 9-13 godina da nauče kako da se predstave na engleskom, njemačkom, francuskom i španskom jeziku, brojeve i usvoje jednostavni vokabular: boje, omiljena životinja i hobiji. Učesnici su takođe rješavali zadatke na radnim listovima, razne križaljke, te ih na kraju dekorisali. Omladinska organizacija Svitac je na ovaj način poslala poruku, koliko je poznavanje stranih jezika važno, ali i zanimljivo, jer omogućava komunikaciju sa ljudima iz raznih dijelova svijeta.

Radionice sambe



Učesnici su radili na sopstvenoj kompoziciji radnog naslova „Beyonde“. U rad su, osim do sada uobičajenih instrumenata, uključene električna i bas gitara. Na radionicama je razrađen uvod, tema i četiri prelaza.

Radionice gitare

Učesnici ove radionice nastavili su sa redovnim aktivnostima i uvježbavanjem novih tehnika, etida, kompozicija i dueta. Osim ovoga učesnici su radili na komponovanju kraćih melodija uz datu harmoniju (dvanaesto-taktni blues) ili zadani modalitet.

Za mart se planira nastavak svih redovnih radionica Omladinske organizacije Svitac.



Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo

Tel/fax: +387 33 205 850

E-mail: asubih@yahoo.com

Web: www.asubih.ba

Drugi mjesec 2018. godine u Asocijaciji srednjoškolaca u Bosni i Hercegovini je bio ispunjen nizom aktivnosti.

Fond Socijalnog dana

Početak mjeseca februara, 12.2.2018. zatvoren je poziv za dostavljanje projektnih prijedloga koji će finansijski biti podržani iz Fonda Socijalnog dana 2017.

Fond Socijalnog dana svoja sredstva crpi iz istoimenog projekta Socijalni dan koji se održao 20. oktobra 2017. Taj dan je 1078 srednjoškolaca uzelo učešće u ovom projektu, te su zaradili dnevnice koje su uplaćene u Fond iz kojeg se dalje finansiraju omladinski projekti. Na konkurs Asocijacije srednjoškolaca u Bosni i Hercegovini pristiglo je čak 36 omladinskih projekata od kojih je 25 dobilo finansijsku podršku za realizaciju!

Power Up



U periodu od 8. do 11. februara u SHL kući u Sarajevu se održao Power Up seminar na kojem su učestvovali članovi Upravnog odbora i 5 koordinatora lokalnih timova ASuBiH-a. Učesnici su radili na razvijanju viših kongitivnih vještina, vrijednostima iz misije i vizije organizacije, razvijanju strategije razvoja lokalnih timova, pregledu dosadašnjeg rada organizacije i planiranju budućih aktivnosti.

„Prijatelji bez granica“

Pripremni sastanak povodom početka projekta „Prijatelji bez granica“ održan je od 17. do 19. februara u Travniku. U sklopu toga, održana je i press konferencija 17.2.2018. Naime, projekat „Prijatelji bez granica“ je nastavak borbe protiv segregacije u obrazovnom sistemu koja je ranije javnosti prikazana kroz građansku inicijativu „Naša škola“. Cilj projekta je međusobno povezivanje srednjoškolaca iz deset lokalnih zajednica koje su pogođene ovim problemom ili su primjer dobre prakse kako prevazići ovaj problem. Zajednice koje učestvuju u ovom projektu su: Brčko, Bugojno, Busovača, Jajce, Stolac, Žepče, Kiseljak, Gornji Vakuf-Uskoplje, Travnik, Mostar. Tokom ove godine srednjoškolci iz tih zajednica će učestvovati u razmjenama i na taj način bolje upoznati jedni druge, ali i javnost sa ovim problemom.

StartMeUp

21. februara član Upravnog odbora Din Ferizović predstavljao je ASuBiH na StartMeUp konferenciji koja se održala u hotelu „Hills“ u Sarajevu. Projekat Start Up Competition koji je realizovan početkom godine u partnerstvu sa Univerzitetom BURCH. Čitav koncept projekta baziran je na promociji poduzetništva među mladim ljudima. Konferencija je aktivnost koja je uslijedila nakon StartUp takmičenja koje je održano krajem januara i na kojem su tri srednjoškolske biznis ideje dobile priliku za razvijanje. StartMeUp konferenciji prisustvovali su stručnjaci iz oblasti poduzetništva i poznati bh poduzetnici, predstavnici mnogih univerziteta u Bosni i Hercegovini te sami srednjoškolci i organizatori.

„The VET Working Group“

U periodu od 23.2. do 26.2.2018. koordinatorica lokalnog tima Goražde Ema Tutić predstavljala je Asocijaciju srednjoškolaca u BiH na OBESU događaju pod nazivom „The VET Working Group“ u glavnom gradu Finske, Helsinkiju. OBESU (The Organising Bureau of European School Student Unions) je mreža svih srednjoškolskih organizacija u Evropi. ASuBiH je punopravni član OBESU-a od 2009.godine.

Tokom mjeseca februara nastavili smo raditi na našem projektu „Istraživanje o kvaliteti praktične nastave u srednjim školama u Bosni i Hercegovini“. Kao dio publikacije koja će biti objavljena u mjesecu martu 2018., urađeno je preko 5000 anketa u 18 lokalnih zajednica u Bosni i Hercegovini.



„Za mlade, bez razlika!“

U periodu od 2.2. do 4.2. lokalni tim Novi Grad je održao seminar pod nazivom „Za mlade, bez razlika!“ koji je okupio preko dvadeset srednjoškolaca iz različitih lokalnih zajednica. Srednjoškolci su obrađivali teme segregacije i diskriminacije na osnovnu religije i nacionalnosti, na unapređenju osobina javnog zagovaranja i prepoznavanja problema u zajednici kako bi se razvili još više postojeći kapaciteti u sljedećim gradovima: Banja Luka, Bihać, Cazin, Novi Grad.

„Sedam Snježana i patuljak“.

U sklopu programa povodom obilježavanja 758 godina grada Bihaća, članovi tog lokalnog tima su 23.2.2018. u Kulturnom centru u Bihaću održali predstavu „Sedam Snježana i patuljak“.



Kao i svake godine, i 2018. mjesec Mart će biti ispunjen raznim aktivnostima. Već na samom početku mjeseca planirana je prva regionalna edukacija za koordinatore koja će se održati u Tuzli. Kako ASuBiH unutar Upravnog odbora ima 3 mentora od kojih svaki ima po 20 lokalnih timova koje mentorise, tako će biti i 3 regionalne edukacije u 3 različita grada ali sa istim sadržajem i misijom. Glavni cilj edukacije jeste da se novoizabrani koordinatori upoznaju sa strukturom, načinom rada, da razvijaju određene vještine i slično. Edukacije će biti održane u Tuzli, Bihaću i Mostaru. Nakon toga, planiran je projekat „Global Money Week“ koji ima za cilj promovisanje pametnog korištenja i štednju novca. Lokalni timovi u sklopu tog projekta organizuju radionice sa bankama. Na kraju mjeseca planirana je publikacija i završna konferencija „Istraživanja o kvaliteti praktične nastave“ koja će biti u Sarajevu.



Međunarodni centar za djecu i omladinu FORTIS

Ul. Suljo Čilić bb, 88420 Jablanica

Tel./fax: +387 63 334 993, +387 61 327 427

E-mail: centarfortis@yahoo.com

Web: www.centar-fortis.org

Održane besplatne radionice za mlade u prostorijama Centra „Fortis“ u Jablanici



Mladi u općini Jablanica (njih cca. 2966) nemaju puno prilike da učestvuju u radionicama tipa digitalne fotografije. U sklopu nastavka projekta „Razglednica“ - Škola digitalne fotografije za mlade, održane su besplatne radionice za mlade u prostorijama Centra „Fortis“ u Jablanici.

Na radionicama su mladi naučili o tehnikama snimanja fotoaparatom, korištenju web stranicama, usavršavaju postojećeg znanja iz ove oblasti, ističući svoje umjetničke sposobnosti. Projekat nastaje iz potrebe mladih za kreativnim vidom provođenja slobodnog vremena i nedostatka sličnih programa u lokalnoj sredini za koju se program realizuje.

Edukacija je bila usmjerena na tehnikama snimanja fotoaparatom, na pravilnom držanju fotoaparata, na osvjetljenju, fokusiranju centralnom tačkom, WB, korištenju histograma sa praktičnim vježbama. Izrađena je nova platforma - web stranica za učesnike na kojoj su predstavljene razglednice učesnika sastavljene od kreacija učesnika. Razglednice su besplatne i mogu se pronaći kako na novoj platformi <https://razglednica.centar-fortis.org/>, tako i u prostorijama Centra „Fortis“.

Budući da BiH teži ulasku u Evropsku uniju, potrebno je i da u domenu obrazovanja mladih ispuniti određene kriterije date u konvencijama EU i strategijama EU. Kako bi mladi izgradili sebe kao ličnosti koje će sutra doprinositi cjelokupnom društvu, korisno je, ako ne i neophodno, da mladi provode korisno svoje slobodno vrijeme. Kroz korisno iskorišteno slobodno vrijeme mladi dolaze do novih znanja, vještina i kontakata koje mogu iskoristiti za vlastiti napredak.

Projekat je podržan od Federalnog ministarstva kulture i sporta-Federalnog ministarstva kulture i športa, Mreže za izgradnju mira, Vijeća mladih općine Jablanica.

Radionicu organizuje Međunarodni centar za djecu i omladinu "Fortis" iz Jablanice, a predavači radionica bili su Džejlja Beganović i Alik Lončar.

Više detalja i slika možete pronaći na našoj stranici www.centar-fortis.org, kao i na Facebook stranici <https://www.facebook.com/Medunarodni-centar-za-djecu-i-omladinu-Fortis-309463309105828/>



Institut za
razvoj mladih KULT



Ul. 4. Viteške brigade
34 – 36 BA, 71210 Ilidža, Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org

Lokalnim građanskim inicijativama do bolje BiH



Ulice Vareša dobit će nove table sa legendama o njihovom nazivu, a zahvaljujući Udruženju inicijativa mladih, jednoj od organizacija kojima je Institut za razvoj mladih KULT dodijelio sredstva za realizaciju lokalnih građanskih inicijativa.

Lokalne građanske inicijative realizovat će i organizacije iz Nevesinja, Stoca, Blažuja, Gradačca, Ugljevika, Bosanske Krupe, Visokog, Vareša i drugih dijelova Bosne i Hercegovine.

Realizaciju inicijativa finansijski je podržao Institut za razvoj mladih KULT, a ugovore o dodjeli sredstava za realizaciju malih građanskih inicijativa u Sarajevu je 10. februara 2018. godine potpisalo petnaest organizacija sa područja BiH.

Riječ je o inicijativama koje su mladi ljudi prepoznali kao problem ili nedostatak u svojim lokalnim zajednicama, a koje će kroz aktivan angažman mladih ljudi, podršku Instituta, lokalnih vlasti i organizacija, napokon biti riješene.

Tako ćemo do juna 2018.g. imati uređena školska dvorišta u ruralnim dijelovima BiH, poboljšane kulturne i sportske sadržaje, poboljšan kvalitet zraka, a neke organizacije će pružiti i konkretnu pomoć osobama sa umanjnim intelektualnim sposobnostima.

Lokalna građanska inicijativa (LGI) jeste akcija, aktivnost građana/ki usmjerena na poboljšanje stanja u lokalnoj zajednici i društvu u kojem žive. U građanske aktivnosti mogu se uključiti građani/ke pojedinačno ili zajednički, a sve s ciljem ukazivanja na konkretne probleme i rješavanja problema u zajednici u kojoj žive.

Institut za razvoj mladih KULT podržao je oko 13 500 mladih u Bosni i Hercegovini i regiji u njihovim zajedničkim inicijativama za poboljšanje položaja mladih u društvu. U posljednjih 5 godina Institut je dodijelio preko 2.500.000 KM kroz grantove nevladinim organizacijama. Dokaz je to društvene osviještenosti i spremnosti građana/ki, posebno mladih, da budu pokretači pozitivnih promjena u svojoj zajednici.

Objavljen Javni poziv za obuku stručnih saradnika/ca za rad s mladima

Institut za razvoj mladih KULT u februaru je raspisao Javni poziv za obuku stručnih saradnika/ca za rad s mladima.



Na obuku se mogu prijaviti sve osobe nastanjene u Bosni i Hercegovini koje imaju završenu najmanje srednju školu, rade s mladima u omladinskim centrima, omladinskim klubovima, omladinskim organizacijama, organizacijama koje rade s mladima, nevladinim organizacijama, savjetovaništima i institucijama koje provode projekte za mlade, a rok za prijavu je 20. mart 2018. godine.

Institut obukom podržava osobe koje rade s mladima i unaprjeđuje njihove vještine i

znanja za razvoj omladinskog sektora i omladinskog rada u Bosni i Hercegovini. Pored četiri modula obuke polaznici/e dobijaju konkretne praktične zadatke i rad u svojoj zajednici nakon svakog modula, te imaju završno testiranje, nakon čega stječu pravo na certifikat.

Stručni saradnici/ce za rad s mladima (poznatiji kao omladinski radnici/ce) predstavljaju osobe koje rade u omladinskim centrima, omladinskim klubovima, omladinskim organizacijama, organizacijama koje rade s mladima ili javnim ustanovama koje podržavaju razvoj mladih ljudi. Stručni saradnika/ca podržava profesionalni, lični i obrazovni razvoj mlade osobe. Radeći s mladima na različitim idejama i inicijativama, stručni saradnici/ce za rad s mladima rade i na razvoju zajednica u kojoj djeluju.

Na inicijativu Instituta za razvoj mladih KULT 2014. g. zanimanje stručnog saradnika/ce za rad s mladima uvršteno je u klasifikaciju zanimanja Agencije za statistiku BiH.

Šta su mladima timski rad i liderstvo?

U februaru je počela obuka „Uči, misli i djeluj!“ za trinaestu generaciju polaznika/ca, a timski rad i liderstvo bila je tema prvog modula.

Prvi modul održan je od 16. do 18. februara 2018. godine u Obrazovno-raznodnom centru za mlade Spajalica, a okupio je 25 mladih iz skoro svih dijelova Bosne i Hercegovine.

Za polaznike/ce obuke tokom ovog modula organizovana je „Kafa sa...članovima Fudbalskog klupa Željezničar“. O važnosti timskog rada i liderstvu sa mladima su razgovarali Omer Joldić, trener omladinskog tima FK Željezničara i Haris Topalović, sekretar omladinske selekcije ekipe sa Grbavice.



Haris Topalović, sekretar omladinske selekcije FK Željezničar bio je i jedan od polaznika prve generacije UMiD obuke, pa su mladi mogli više saznati i o koristima koje mu je pohađanje obuke donijelo tokom životnih i profesionalnih ostvarivanja.

Ovim modulom počelo je putovanje koje će trajati godinu dana, a mladi će imati priliku da uče o građanskom aktivizmu i volontiranju, politikama prema mladima i javnom zagovaranju. Učit će i o komunikaciji i ljudskim pravima, ali i raditi na samoosnaživanju i rješavanju konflikata.

Obuka UMiD - "Uči, misli i djeluj!" zvanično je priznati vid neformalnog obrazovanja koje mladima pruža mogućnost sticanja različitih kompetencija koje će ih učiniti konkurentnim na tržištu rada, a program se sastoji od seminara, praktičnih vježbi i volonterskog rada. UMiD je namijenjen mladim ljudima do 30 godina.

Biznis forum "Rasterećenjem privrede do novih radnih mjesta" 7. marta u Bihaću



Biznis forum "Rasterećenjem privrede do novih radnih mjesta" nakon Tešnja, Tuzle, Bijeljine i Neuma, 7. marta 2018. godine bit će održan u Bihaću.

Forumu će prisustvovati privrednici, mladi preduzetnici, predstavnici vladinog, akademskog i nevladinog sektora, studenti/ce i svi oni koji žele i misle da mogu poboljšati stanje u bh. privredi.

Cilj foruma je razgovarati o teretima koji ograničavaju rast i razvoj privrede u Federaciji BiH sa fokusom na Unsko-sanski kanton, mogućnostima za njihovo prevazilaženje, inicijativama i aktivnostima koje se provode u svrhu ekonomskih reformi, programima i mjerama poticaja zapošljavanju i samozapošljavanju, posebno mladih, te prilikama i preprekama za pokretanje biznisa. Detektovati ćemo probleme koji ograničavaju rast i razvoj privrede u Bosni i Hercegovini, ali i pokušati ponuditi konkretna rješenja.

Između ostalog, biće predstavljeni rezultati istraživanja dodjele budžetskih poticaja privredi u periodu 2012-2015., te inicijativa bh. privrednika za plaćanje PDV-a državi po naplaćenim umjesto izdanim računima.

O temama će govoriti predstavnici resornih institucija vlasti, istaknuti stručnjaci iz oblasti ekonomije, poslovnog okruženja i zapošljavanja, privrednici uspješnih preduzeća i mladi preduzetnici. U konačnici, namjera je okupiti predstavnike vlasti, privrede i mlade ljude radi vođenja konstruktivnog dijaloga o pitanjima unaprjeđenja poslovnog okruženja i prilika za zapošljavanje u BiH.

Biznis forum se organizira u okviru inicijative pod nazivom „Poslovni prostor BH“ koju Institut za razvoj mladih KULT od 2014. godine provodi u okviru Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

Biznis forum posvećen je privrednicima i privredi, a organizuju ga Institut za razvoj mladih KULT i Ministarstvo privrede Unsko-sanskog kantona.



H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Doboje

Tel./fax: +387 53 226 886

E-mail: merhamet.doboj@cutuk.net

FB: www.facebook.com/Merhamet-Doboj

Osim stalnih aktivnosti H.O. Merhamet Doboje je tokom marta radio i sljedeće:

15.02.2018 Održana je godišnja Skupština H.O. MDD "Merhamet-a" Doboje. Prvo je održan radni dio, aktivnosti, finansijski izvještaj, materijalno zaduženje i brošura. Na svečanom dijelu su podijeljene zahvalnice onima koji su doprinijeli jačanju "Merhamet-a" i podržali obimne aktivnosti, kao i predstavnicima vlasti. Skupština je protekla u najboljem redu.



20.02.2018 Održan je sastanak predstavnika OSCE-a Siniše Petrovića sa predsjednicom Avdić Faketom. Teme sastanka bile su status kao NVO sektora, obrasci koje je trebalo popuniti o urađenim projektima 2013 godine, broju zaposlenih i dr.

24.02.2018 Podjela humanitarne pomoći. Podjelom je obuhvaćeno 300 porodica.



26.02.2018 Održan je seminar u Banjaluci, koji je organizovao OSCE. Tema seminara je bila savremeniji način pisanja projekata. Učestvovali su predstavnici 10 "Merhamet-a" iz RS-a, na čelu sa direktorom regije Jasminom Spahićem, inicijatorom ovog veoma uspješnog seminara.

27.02.2018 Predsjednica "Merhamet-a" Doboje Avdić Faketa je prisustvovala godišnjoj Skupštini "Unije za povratak" čiji je "Merhamet" Doboje aktivna članica. Bilo je zaista konstruktivno jer su teme aktuelne. Zadatak je bio rješavanje pitanja povratnika, raseljenih i domicilnih osoba.





PRONI Centar za omladinski razvoj
Ul. Mehmedagića 24, 76100 Brčko distrikt BiH
Tel./Fax: +387 49 217 695
E-mail: pronibrbc@teol.net
www.pronibrcko.ba

Okrugli sto “Povećanje učešća mladih u izbornom procesu”



U četvrtak, 1. februara, obilježen je Svjetski dan izbora u prostorijama Centralne izborne komisije BiH u Sarajevu. Okruglom stolu prisustvovalo je 30 ljudi, uključujući predsjednicu Centralne izborne komisije Dr. Irenu Hadžiabdić, pomoćnika ministra iz Ministarstva civilnih poslova BiH, Adnana Husića i nekoliko članova Centralne izborne komisije BiH, kao i predstavnike PRONI Centra za omladinski razvoj. Okrugli sto praćen je velikom medijskom pažnjom.

U 11h uslijedile su izjave za medije, a nakon toga riječi dobrodošlice predsjednice Centralne izborne komisije. Moderator je bila službenica CIK-a Maksida Pirić, koja je otvorila manifestaciju. Ispred Udruženja izbornih zvaničnika BiH, gospođa Uma Isić održala je prezentaciju na temu „Povećanje učešća mladih u izbornom procesu“ i predstavila projekat svoje organizacije „Mladi za mlade-prvi put glasaš“. Dala je objašnjenje projekta, predstavila trenere, aktivnosti i partnere. Skrenula je pažnju na brojnost mladih koja se iz godine u godinu smanjuje.

Uslijedile su prezentacije četiri petočlana tima od kojih je svaki imao po jednog glasnogovornika koji je predstavljao grupu. Prisutni su bili članovi Tima vijeća mladih iz Federacije BiH, dva tima iz Istočnog Sarajeva kao i tim iz Brčko distrikta ispred PRONI Centra za omladinski razvoj (Marija Radić, Harun Šabanović, Dejan Rađen, Arnela Podbićanin i Ismail Selmanović). Svi su imali zajedničku temu: „Povećanje učešća mladih u izbornom procesu“. Prezentacije su obuhvatale neke od glavnih problema neizlaska mladih na izbore, predložena su neka od rješenja i objašnjeni načini na koji bi se mogle izvesti određene promjene. Jednim od najvećih problema smatra se „politika na lošem glasu i iskorištavanje mladih u strankama“ gdje se, kako tvrde ispitanici, dovoljno ne vrednuje njihovo zalaganje i ne pruža podrška novim inovacijama i idejama.

Manifestacija je završena riječju člana Centralne izborne komisije, Dr. Suada Arnautovića.

TRODNEVNA RADIONICA: Identitet, stereotipi, predrasude i diskriminacija

U okviru projekta „Mladi za bolju budućnost“ koji ORC Tuzla uspješno realizuje od septembra mjeseca 2017. godine pod finansijskom potporom Ambasade Sjedinjenih Američkih Država u Bosni i Hercegovini i Grada Tuzla u toku mjeseca februara planirane su radionice za mlade između 16-30 godina u gradovima: Vitez, Doboju, Brčko i Tuzla.

Radionica je održana od 14.02. do 16.02. u Brčkom (Omladinski Centar Brčko) sa početkom od 14h. Radionicu je organizovao PRONI Centar za omladinski razvoj u saradnji sa Omladinskim resursnim centrom Tuzla. Teme radionice koju su voditi certifikovani vršnjački edukatori bile su Identitet, stereotipi, predrasude i diskriminacija. Zahvaljujući svesrdnoj pomoći gorepomenutih donatora, radionice za sve učesnike su bile besplatne, te su za učesnike pokriveni troškovi ishrane i osvježjenja tokom radionice. Po završetku radionice svim učesnicima su uručeni sertifikati kao potvrda o učešću na radionicama, te 5 najaktivnijih učesnika iz svakog grada su nagrađeni učešćem na petodnevnom događaju u Tuzli u sklopu projekta „Mladi za bolju budućnost“.

#reGeneracija u Brčkom

Projekat USAID-a, re:Generacija, koji implementira Međunarodni republikanski institut u BiH i Udruženje Magacin Kabare, ima za cilj da educira i motivira mlade da zagovaraju pomirenje i suživot svih naroda, naročito među mlađim generacijama.



Kroz različite radionice i aktivnosti, učesnici projekta će utjecati na podizanje svijesti o pomirenju u svojim sredinama, ali i izvan njih. Mladi Ambasadori pomirenja, učesnici USAID-ovog [Američka agencija za međunarodni razvoj] projekta re:Generacija, u petak su posjetili Skupštinu Brčko distrikta, nakon čega su obišli spomenike palim borcima te upriličili edukativno druženje sa bivšim pripadnicima Armije Republike Bosne i Hercegovine, Vojske Republike Srpske i Hrvatskog vijeća obrane iz ovog grada.

Trojica ratnih veterana, nekada pripadnika tri različite vojske, u društvu mladih Ambasadora obišli su spomenike podignute palim borcima sve tri vojne jedinice te održali radionicu o pomirenju i zajedničkom životu u Brčko distriktu, ali i cijeloj BiH.

Cilj ovog druženja bilo je podizanje svijesti o razumijevanju, poštivanju i ujedinjenju među svim etničkim grupama u BiH, koje je neophodno na njenom putu ka boljoj budućnosti.

“Željeli smo pronaći tri osobe koje će biti pozitivan primjer suživota, bez obzira na njihova iskustva iz prošlosti. Kada čujete priče ovih vojnika i pogledate njihove živote danas, zaista povjerujete da ima nade da se promijene predrasude i zajedno krene naprijed. Iako su se nekad borili na tri različite strane, ovi ljudi danas su sugrađani, prijatelji i kolege koji su spremni zajedno graditi bolju budućnost. Smatramo da iz ovakvih primjera možemo puno naučiti”, poručili su mladi aktivisti iz Brčkog koji su osmislili ovu akciju.

Podrška vlasti u Brčkom

Predsjednik Skupštine Esed Kadrić razgovarao je s mladim Ambasadorima pomirenja iz deset gradova u BiH. Izražavajući zadovoljstvo razgovorom koji je imao s mladim ljudima koji, kako je rekao, imaju plemeniti cilj da rade na pomirenju u BiH, Kadrić je u izjavi za medije rekao da u tome imaju punu podršku vlasti u Brčkom.

“Vjerujem da će ovo što rade biti normalno ponašanje u godinama koje su pred nama i da će ovaj njihov angažman biti prepoznat u široj društvenoj zajednici kao model ponašanja svih. Mi u Brčkom ističemo da smo dobar ili najbolji primjer u BiH kada su u pitanju tolerancija, suživot, međusobno razumijevanje i uvažavanje, ali uvijek ima prostora da se dodatno izgrađuje naša zajednička vizija razvoja i budućnosti omladine u Brčkom i ovaj projekt može nam u tome pomoći”, rekao je predsjednik Kadrić.

Projekat USAID-a, re:Generacija, koji implementira Međunarodni republikanski institut u BiH i Udruženje Magacin Kabare, ima za cilj da educira i motivira mlade da zagovaraju pomirenje i suživot svih naroda, naročito među mlađim generacijama.

Kroz različite radionice i aktivnosti, učesnici projekta će utjecati na podizanje svijesti o pomirenju u svojim sredinama, ali i izvan njih.

Aktivnosti mladih Ambasadora, kao i drugi dijelovi projekta re: Generacija, bit će snimljeni i ekranizirani u obliku dokumentarnog filma čija se premijera očekuje na jesen ove godine.

PODGORICA – Konferencija: Omladinski rad u borbi protiv nasilnog ekstremizma

Forum MNE je u partnerstvu sa šest država regiona Zapadnog Balkana (Crna Gora, Srbija, Makedonija, Kosovo, Albanija, Bosna i Hercegovina) organizovao regionalnu konferenciju “Omladinski rad u borbi protiv nasilnog ekstremizma”. Cilj konferencije je identifikovanje efektivnih praksi u omladinskom radu koje bi doprinijele prevenciji nasilnog ekstremizma među mladim ljudima u regionu.



Konferencija je okupila predstavnike šest zemalja iz regiona, koji dolaze iz redova civilnog društva, organa reda i institucija nacionalnog i lokalnog nivoa.

PRONI Centar kao partnerska organizacija iz Bosne i Hercegovine učestvovao je sa predstavnicima omladinskih radnika, predstavnika Policije Brčko Distrikta, predstavnika odjela za stručne i administrativne poslove kao i predstavnik Vijeća Mladih FBiH.

Na početku učesnici su razgovarali o tome koji su to pokretači nasilnog ekstremizma i šta društvo može učiniti da do njegovog razvoja ne dođe.

Na konferenciji je pokrenuta diskusija o pokretačima nasilnog ekstremizma i podsticajima koji doprinose njegovom razvoju. Posljednja sesija prvog dana konferencije bila je posvećena svjedočenju Esada Kundakovića iz Novog Pazara čiji je sin poginuo na ratištu u Siriji. Svojim govorom pokušao je da skrene pažnju na značaj direktnog rada sa mladima i blagovremenog osluškivanja njihovih potreba i razmišljanja.

Tokom drugog dana konferencije nastavljena je diskusija o ulozi omladinskog rada u borbi protiv nasilnog ekstremizma i ulozi koju organizacije civilnog društva, a posebno omladinski radnici imaju u ovom procesu. Drugog dana učesnici su intezivno radili u 3 tematske grupe. Tematske grupe su se odnosile na nivou Vlade, međunarodnih aktera i na nivou mladih i civilnog društva. Preporuke će biti uskoro dostupne.

Konferencija je dio projekta “Otpornost mladih prema radikalnim i ekstremnim ponašanjima” koji sprovodi organizacija Forum MNE(www.forum-mne.com) u partnerstvu sa DamaD-Srbija, PRONI Centar za omladinski razvoj-Bosna i Hercegovina, Institut za demokratiju i medijaciju -Albanija, FIQ Forum za građanske inicijative-Kosovo i SEGA, Koalicija omladinskih organizacija-Makedonija.

Projekat je finansijski podržao Balkanski fond za demokratiju, projekat Njemačkog Maršal fonda SAD.



Udruženje studenata Medicinskog fakulteta u Tuzli "Medicus"

Univerzitetska br. 1., 75 000 Tuzla

Tel: predsjednik: 00 387 (62) 944-739; sekretar: 060/3101-602;

Telfax: 035/320-600(1).

web: www.us-medicus.ba;

e-mail: medicus.tz@gmail.com; info@us-medicus.ba

Jubilarno obilježavanje petog Tuzla Brain Weeka!

Kao i prethodne četiri godine, i ove se godine implementira projekt obilježavanja Sedmice mozga u Tuzli pod nazivom „Tuzla Brain Week“ – TBW. Projekat se obilježava u okviru globalne sedmice mozga, te je jedini projekat iz Bosne i Hercegovine koji je do sada svake godine dobijao podršku od strane DANA Fondacije (New York, USA) i FENS (Federacija europskih neuroznanstvenih društava) kao originalnih začetnika ove inicijative. Ovogodišnji TBW će se implementirati od 12. – 18. marta sa generalnom temom: Mozak budućnosti.



Tuzla Brain Week (TBW) je dugogodišnji projekt Studentskog vijeća Medicinskog fakulteta Univerziteta u Tuzli „MEDICUS“ koji se implementira u saradnji sa Medicinskim fakultetom Tuzla, Univerzitetom u Tuzli i Univerzitetskim kliničkim centrom Tuzla.

Kao tradicionalni dio projekta i dalje će se održati koncept „dobnih radionica“ gdje će studentski timovi raditi sa korisnicima brojnih odgojno-obrazovnih ustanova kao što su vrtići, osnovne škole, srednje škole, starački domovi i dr – te ovim putem omogućaviti uključivanje različitih populacionih grupa kao učesnika ovoga projekta.

Glavni cilj projekta jeste edukacija i promocija neuroznanosti na posebno koncipiran način koji će biti prilagođen i razumljiv za sve njegove učesnike, te povezivanje studenata i profesionalaca sa ciljem unapređenja zajednice kroz nauku.

Pored dobnih radionica, ove godine su pripremljene i stručne radionice na kojima će učesnici imati priliku praktično izučavati oblasti poput neuroradiologije, neurohirurgije, neurologije i brojnih drugih oblasti koje su u skladu sa generalnom temom projekta. Ove godine je jedan dio aktivnosti posvećen promociji biomedicinskog inženjeringa i multidisciplinarnosti biomedicinskih nauka sa drugima. Kroz cijeli projekt su planirana i predavanja od strane renomiranih imena iz oblasti neurologije, neurohirurgije, psihijatrije, biomedicine, genetičkog inženjeringa, javnog zdravstva, i dr.

Koordinatorice ovogodišnjeg projekta su studentice Asja Brkić i Ilvana Rabotić.

Kao i prethodnih godina, u želji za promocijom studentskog rada i razvijanja naučnog dijaloga, tu je i naučna sesija koja će omogućiti svim studentima prezentaciju njihovih radova, te koji će u sklopu ove aktivnosti biti nagrađivani. TBW Talks je još jedna novina projekta koja služi za promociju uspješnih mladih ljudi iz oblasti koje se vežu za ovaj projekt. Zbog velikog broja zainteresovanih učesnika iz zemalja poput Turske, Grčke, Austrije, Ukrajine i drugih, dio programa je prilagođen i na engleskom jeziku.

Pored navednih institucija partneri na projektu su također i Vlada Tuzlanskog kantona, Ministarstva zdravstva Tuzlanskog kantona, Ministarstva obrazovanja i nauke Tuzlanskog kantona, Ljekarska komora Tuzlanskog kantona, kao i brojni drugi partneri i medijski sponzori projekta.

INFORMACIJE / DONATORI / POZIVI

Najbolje prilike za novinarske grantove 2018.

Novinari iz Bosne i Hercegovine i regiona i ove godine mogu aplicirati za brojne grantove i stipendije. Donosimo pregled nekih od dostupnih grantova i stipendija za novinare, koji uključuju edukacije i studijska putovanja.

Balkanska stipendija za novinarsku izvrsnost

Balkanska istraživačka mreža (BIRN) svake godine bira deset novinara koji će dobiti novčanu i profesionalnu podršku za svoja istraživanja na temu koja je bitna za region i EU – 2018. godine tema je ISTINA. Za stipendiju se mogu prijaviti iskusni novinari iz Bosne i Hercegovine, Srbije, Albanije, Bugarske, Hrvatske, Kosova, Makedonije, Crne Gore, Rumunije i Grčke.

Kandidati koje izabere stručni žiri dobit će stipendiju u iznosu od 2.000 eura, kao i dodatnih 2.000 eura za troškove putovanja i istraživanja. Oni će također prisustvovati međunarodnim seminarima, konstantno dobijati podršku mentora tokom rada na svojim pričama, koje će biti objavljene u regionalnim i međunarodnim medijima. Tri najbolje priče izabrane od stručnog žirija također će dobiti novčane nagrade. Detaljna uputstva o konkursu možete naći na BIRN-ovom [sajtu](#) a rok prijave je do 12. marta.

Reporters in the Field

Program je namijenjen visokokvalitetnim istraživačkim projektima novinara sa njemačkog govornog područja i drugih zemalja Evrope. Novinarski timovi dobit će podršku za prekogranična putovanja za potrebe istraživanja priče po svom izboru.

Prvi krug aplikacija u 2018. godini otvoren je do 25. marta. Program nudi grant do 8.000 eura međunarodnim timovima, za važnu prekograničnu priču. Timovi novinara mogu biti sastavljeni od novinara iz Bosne i Hercegovine i regije i drugih evropskih zemalja. Više o načinu prijave [ovdje](#).

Evropsko novinarstvo u digitalno doba: Pravne i praktične radionice za novinare, aktiviste i pravnike u organizaciji Centra za medije, podatke i društvo na Centralnoevropskom univerzitetu CEU u Budimpešti. Radionice će biti održane na Balkanu od 25. do 27. maja 2018. nakon čega slijede devetosedmične online instrukcije. Prijave do 5. marta. Više o načinu prijave [ovdje](#).

Evropska stipendija za novinarstvo

Svake godine, 10 do 15 stipendija bude dodijeljeno novinarima iz Istočne i Zapadne Evrope i SAD-a, koji žele da provedu dva semestra na istraživačkom projektu u Berlinu. Program European Journalism Fellowships traje od 1999. na Međunarodnom centru za novinarstvo na Freie Universitaet Berlin. Više o stipendijama i načinu prijave [ovdje](#).

Grantovi Journalismfund.eu

Podrška je namijenjena kvalitetnim istraživanjima profesionalnih novinara koji imaju dobre ideje za prekogranične priče o dešavanjima u Evropi. Grantovi će biti dodijeljeni za projekte koji inače ne bi dobili finansiranje.

Journalismfund.eu daje podršku u troškovima za sve vrste medijskih istraživanja što uključuje putovanja, prevode, pristupe bazama podataka i vrijeme provedeno u istraživanju, ali ne i troškove kancelarijskog materijala, opreme i produkcije. Prijave je moguće poslati u nekoliko navrata, a naredni rokovi su: 1. maj, 1. oktobar i 15. novembar. Više informacija dostupno je [ovdje](#).

Program stipendiranja Reuters Instituta za studij novinarstva

Reutersov program stipendiranja pruža mogućnost novinarima sa dobrim poznavanjem engleskog jezika i minimalno pet godina radnog iskustva, da u sklopu istraživačkih projekata [borave nekoliko mjeseci na Univerzitetu u Oxfordu](#).

Izabrani aplikanti dobit će priliku pohađanja raznih seminara o ključnim trendovima i razvoju u oblasti žurnalizma, radit će sa iskusnim supervizorima na svojim istraživačkim projektima, posjetit će najveće svjetske novinske organizacije, kao i ključne kulturne i političke organizacije i institucije u Velikoj

Britaniji. Pored toga, program stipendiranja polaznicima nudi internacionalnu razmjenu iskustava, s obzirom na to da svake godine u njemu učestvuje oko 25 novinara iz prestižnih medijskih organizacija širom svijeta.

Knight Science Journalism stipendije za novinare koji pišu o nauci

Svake godine deset novinara koji se bave izvještavanjem o nauci mogu dobiti [devetomjesečnu stipendiju](#) koja im omogućava da se posvete istraživanju nauke, tehnologije, vještina in-depth novinarstva, kao i specifičnom naučnom polju.

Tokom akademske godine, stipendisti moraju razviti projekat, koji može predstavljati temelje priče ili detaljan izvještaj na temu specifičnog naučnog polja. Stipendisti će boraviti u Bostonu/Cambridgeu od 12. augusta 2018. godine do 25. maja 2019. godine. Krajni rok za prijavu je 28. februar 2018.

Podrška ženskim organizacijama i udruženjima žena „Odvažne i hrabre, to ste vi!“

Projekat 8.mart

Podrška ženskim organizacijama i udruženjima žena

“Odvažne i hrabre, to ste vi!”

Opis aktivnosti:

U BiH postoje razne ženske organizacije i udruženja koja imaju različite ciljeve, poput borbe za jednakopravnost polova, poboljšanja ekonomskog položaja i životnog standarda žene, pružanja psihološke, socijalne, pedagoške i pravne pomoći ženama i slično.

Cilj projekta “Odvažne i hrabre, to ste vi!” je pružiti podršku ženskim organizacijama i udruženjima, doprinijeti njihovom radu i uslovima, te ojačati njihov status i poziciju. Kroz ovaj projekat, najbolje ideje bi bile nagrađene konkretnom materijalnom podrškom.

Donacija I: 5.000 KM

Donacija II: 4.000 KM

Donacija III: 3.000 KM

Pozivamo sve zainteresovane organizacije i udruženja da prijave svoje projekte i ideje, kako bi ostvarile pravo učešća u projektu. Poziv se odnosi na sve ženske organizacije i udruženja unutar BiH, koje imaju ideju i žele unaprijediti i razviti poslovanje istih.

Poziv traje **od 14.2. do 7.3.2018.**, a objava nagrađenih projekata će se izvršiti **8.3.2018.**

Za sudjelovanje je potrebno izvršiti prijavu i poslati detaljniji opis projekta.

Na ovaj način želimo simbolično na Dan žena obradovati dame unutar pomenutih organizacija i udruženja i doprinijeti njihovom radu, jer su one te koje na različite načine doprinose našoj zajednici i pružanju podrške ženama u BiH.

Pravila i uslovi:

Početak prijava: **14.2.2018**

Rok za završetak prijava: **7.3.2018. do 12:00**

1. Nosilac projekta će Organizatoru uputiti prijedloge projekata.
2. Organizator projekta će Nosiocima pobjedničkih projekata uputiti prijedloge Ugovora o donaciji.
3. Prijavom nosilac prihvata da se podaci navedeni u Formularu za prijavu koriste u komunikacijske svrhe od strane Organizatora u štampanom, zvučnom, slikovnom ili video materijalu.
4. Povlačenjem prijave gubi se pravo u daljnjem sudjelovanju.
5. Organizator projekta zadržava pravo informisanja medija u svrhu promocije inicijative što uključuje i eventualno komuniciranje prijavljenih, predloženih i pobjedničkih projekata.
6. Organizator projekta zadržava pravo da u svakom trenutku bez navođenja razloga promijeni Kriterij za izbor projekta i Pravila i uslove inicijative, te obustavi inicijativu naročito ako to bude

potrebno usljed više sile ili vanjskih okolnosti na koje Organizator projekta ne može uticati ili ako samo na taj način bude zagarantovana uredna sprovedba inicijative.

7. Proces selekcije će se odvijati u periodu 5.3.-7.3.2018.
8. Pobjednički projekti će biti proglašeni 8.3.2018. putem online platformi ali i ostalih raspoloživih oficijelnih kanala kompanije Bingo d.o.o. Tuzla.
9. Interna komisija će ocijeniti nivo zadovoljavanja specifičnih kriterija.

Kriterij za odabir projekata :

Organizator projekta Bingo d.o.o. Tuzla zajedno sa partnerima, poziva sve ženske organizacije i udruženja, iz cijele Bosne i Hercegovine koje imaju ideje i projekte za unaprijeđenje njihovog poslovanja i rada.

1. Projekti se prijavljuju u periodu **2.-7.3.2018. godine.**
2. Projekat je potrebno prijaviti putem Formulara za prijavu koji se nalazi na bingotuzla.ba
3. Projekte mogu prijaviti samo udruženja/organizacije sa područja Bosne i Hercegovine.
4. Jedna organizacija ima pravo da prijavi samo jedan projekat.
5. Nosioc projekta prijavom projekta prihvata Pravila i uslove projekta.
6. Nosioc projekta je prilikom prijave dužan navesti sve potrebne podatke u Formularu za prijavu.
7. Kompanija Bingo d.o.o. Tuzla i partneri će odabrati 3 projekta kojima će osigurati jednu od navedenih donacija.
8. Prijava projekta treba uključivati: razradu projekta s vremenskim odrednicama, ciljevima i aktivnostima za koje su potrebna finansijska sredstva.
9. Projekat je jasno definisan ili već u realizaciji. Projekat je novi ili već postojeći.
10. Projekat uključuje i osnažuje korisnike i ciljnu grupu.
11. Nosioci projekta će učinkovito koristiti dobijena sredstva te je Nosioc projekta odgovoran za sprovedbu istog ali i za korištenje sredstava isključivo u svrhu projekta.

Više informacija i prijava: <http://bingotuzla.ba/podrska-zenskim-organizacijama-udruzenjima-zena-odvazne-hrabre-ste-vi/>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba
hcatuzla@bih.net.ba

Mjesečni bilten uređuje
Omladinski resursni centar -
ORC Tuzla

Prevod Biltena na engleski:
Stefan Cvijanović – prof.
engleskog jezika

WEB stranica Mreže:
www.omladina-bih.net

Mejlina lista Mreže:
posta@omladina-bih.net

Webmaster:
emir.delalic@gmail.com